

REGIONAL NEWS BULLETIN

HEADLINES (MORNING)

1. Larsap General (Retd) Vijay Kumar Singh an loneitute'n supply chain mumal tak, kharchhawng inrawlh lohna tur an neih a pawimawh a ti.
2. Ministry of Home Affairs chuan Lengpui Airport venhim hna thawk turin Central Industrial Security Force a a dah a, vawiin atangin hna an thawk tan ang.
3. Pahalgam-a firfiakte chetna chhanlet nan India chuan Pakistan nena Indus Water Treaty 1960 a neih mek chu a titawp.
4. Ramchhunga Political party hruaituten Pahalgam-a firfiakte chetna an dem thu an sawi.

<><><>

GOVERNOR

Larsap General (Retd) Vijay Kumar Singh chuan loneitute'n hlawkna tam zawk an dawn theih nan supply chain mumal tak, a kara midang inzep leh hlawkna tam zawk hlep thin an awm loh nana ruahman a pawimawh thu a sawi.

Nimina Agriculture leh Horticulture Department hotute nen Raj Bhavan-a an inkawmnaah he thu hi sawiin Larsap chuan daih rei zawka lo nei tura hmalak a tul thu a sawi a. Hmalakna tlo leh tluantling, thing leh mau tichereu lo leh leilung tichhe lo thei ang bera eizawna kalpui a tul tih sawiin hei hi tun mai nilo nakin hun thlenga pawimawh a ni, a ti. Fertilizer tel lo thlai thar chhuah kawngah tan lak nasat a tul thu a sawi a, organic thlai a ni ngei a ni tih finfiahna hmun, Laboratory leh standard tha tak state puala neih a tul thu a sawi bawk.

Inkawmhonaah hian Agriculture Department leh Horticulture Department hnuaia Scheme hrang hrang hnuaia hmalakte thlir ho a ni a. Organic state ni thei tura pawimawhte sawiho niin, thlai hrisel tam zawk thar kawnga hmalak tulte bakah a sawngbawlina kawnga tanlak ngaihna laite sawiho a ni.

<><><>

SPORTS MINISTER

Sports & Youth Services Minister Pu Lalnghinglova Hmar chuan Mizoram chu miin an hriat theih tur zawnga phochhuah an tum tih a sawi.

Nimina Sports & Youth Services pisa conference hall-a Aizawl International Half Marathon 2025 chungchanga chanchinbumite a kawmaah he thu hi sawiin Minister chuan khawvelin Mizoram a hriat theih nan infiamna liantham huaihawt a

ngai tih a sawi a. Tuna khawvel huap marathon intihsiakna pawh a aia lian zawka huaihawt zel an tum a ti a. Marathon chu Mizo mipui te hriselna lama tiharh tu ni se a duh thu sawiin Mizote zingah 'Fitness Culture' tuh a duh tih a sawi. International Marathon an huaihawt tur hmangin Mizoram chu Khawvel Marathon Map-ah ziah luh a ni ve tawh dawn a ni a ti a, hei hian Mizoram tan khualzinmite hip kawngah pawh hmasawna a siamsak dawn a ni a ti.

Aizawl International Half Marathon 2025 hi Mizoram sorkar leh Innovations India Advertising & Event Pvt Ltd. te tangkawp buatsaih tur a ni a. Athletics Federation of India (AFI) pawmpui niin anni hian intlansiak pawh an rawn endik dawn a, he intihsiakna hi Larsap Gen (Retd) VK Singh leh Chief Minister Pu Lalduhoma ten Patron an nih angin an uap dawn a ni.

Aizawl International Half Marathon 2025-ah hian a tel duh te tan - Half Marathon (km 21.1), Open Race (km 10), Fun Race (km 5) leh Junior Category (km 5)-ah te intlansiak tur a ni a. Intlansiakah hian a ti thazual te tan Lawmman Rs nuai 10 sem chhuah a ni dawn a. Intihsiak tel tur te hi marathon neih ni tura ruahman, tunkar Inrinniah Zing dar 5:30 AM-ah Rajiv Gandhi Stadium thlen hman tur a ni a. Warm-up hi zing dar 6:00 AM-ah neih a ni ang a, intlansiak hi zing dar 6:30 AM-ah tan a ni ang. Registration hi [www.aihm2025.com](http://www.aihm2025.com) ah hawn a la ni a, tunkar Ningani zan dar 6:00 PM ah khar a ni dawn a. Tualchhung mite chuan Rs 799 pein an inziak lut thei a, ram pawn lammite te chuan USD 30 an chawi a ngai thung a, Naupang leh Force mi te tan tlawm zawka ruahman a ni.

<><><>

## MSPMC

Mizoram State Project Monitoring Committee (MSPMC) chuan an Secretary, Pu Lalthanzuala Ralte kaihhruaiin Lunglei khawpui chhung leh a chhehvela hmasawna hna thawh mek pali an enfiah.

MSPMC Inspection Team hian Lunglei khawpui tui lakna, Tlawng luia Public Health Engineering Department (PHED) hnuai AMRUT 2.0 sum cheng vaibelchhe 4.7 hmanga tui khuah chu tlawh hmasa berin, hna that leh that loh an enfiah a. PHED official-te leh hna thawktu HS Construction te nen tha zawk, tlo zawk leh chak zawka hna thawh a nih theih nana rawtna an neihte leh bawhzui ngai hrang hrangte an sawi ho a ni.

MSPMC Inspection Team hian Commerce & Industries (C&I) Department hnuai Pukpuia cheng vaibelchhe 9.9796 senga Flatted Factory sak mek te, Urban Development & Poverty Alleviation (UD&PA) Department hnuai Lunglawn ram chhung Riangvai Thlanmual bula cheng nuai 600 senga Lunglei Solid Waste Management Centre sak mek leh C&I Department hnuai PWD enkawla Lunglei Chanmari-a North Eastern Council (NEC) sum cheng nuai 1,403.40 senga Lunglei Market & Trade Centre sak mekte tlawhin, an enfiah bawk a.

Department official-te leh hna thawktute nen hna thawh mek dinhmun leh hmachhawp te, harsatna awmte leh tha zawk leh chak zawka hna thawh a nih theih nana bawhzui tur thil pawimawh hrang hrangte an sawi ho a ni.

<><><>

## UNION MOS

Union Minister of State for Planning, Statistics and Programme Implementation leh Minister of State for Culture, Pu Rao Inderjit Singh an nimin khan Hnahthial District tlawhin Hnahthial District chhunga Central scheme hrang hrang kalpui a nih dan chu official-te nen an thlir ho a, Scheme hrang hrang kalpui a nih danah mamawh awmte zawtin India ram chu chawisan a nih theih nan Mizoram tih hmasawn chu thil pawimawh tak a nih thu a sawi.

Pu Rao Inderjit Singh chuan Mizoram chu dan leh hrai kenkawh kawngah fakawm a tih thu leh India ram chhunga state ralmuang berte zing ami a ni chu fakawm a tih thu a sawi a. Hnahthial District chhunga central schemes kalpui dan hriat chian chu a rawn kal chhan ber a ni tiin Hnahthial District mai bakah Mizoram pumpui tih hmasawn chu an tum ber a nih thu a sawi.

Union Minister of State hi nimin tlai khan Delhi panin a haw nghal a ni.

<><><>

## PHE MINISTER

PHE Minister Prof. Lalnilawma chuan Greater Lunglei Water Supply Scheme (GLWSS) tihchangtlun hna thawh mek chu chak taka kalpui a nih theih nan department leh contractor-te chu theih tawp chhuah turin a chah.

Lunglei khawpui tui lakna GLWSS hmun Pialthleng leh Tlawng lui nimina a tlawhnaah he thu hi Minister chuan sawiin Tlawng tui khuah hna thawhna AMRUT 2.0 sum chu a chhuah thuai theih nan Mizoram sawrkar chuan central lam dawrin, an nawr reng tih a sawi a ni.

Lunglei tui lakna, GLWSS tihchangtlunna tur hian thuang hnihin hma lak mek a ni a. Kum 2054 thlenga mihring nuai 1 sing 1 sang 1, 827 chawm thei tur, Tlawng leh Pialthleng lui atanga tui lakna tur ruahmanna, SASCI 2024-2025 sum cheng vaibelchhe 55.7 senga bul tan chhoh mek a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## CISF TO TAKE OVER AIRPORT SECURITY

Ministry of Home Affairs chuan Lengpui Airport venhim hna thawk turin Central Industrial Security Force a ruat thar a, he hna hi vawiin atangin an thawk tan ang.

CISF ten Lengpui Airport venhim hna an thawh bultanna leh anmahni lawmna hun hi vawiin hian Lengpui Airport ah buatsaih a ni dawn a, Mizoram DGP Anil Shukla an a hmanpui ang. CISF hian ramchhunga hmun hrang hrang Airport ah venhimna hna anlo thawk tawh thin a, Lengpui Airport hi Airport 69 an enkawlna tur a ni.

Lengpui Airport thuneitute tarlan danin CISF Unit lokal tur te hi an vaiin 214 an ni a, amaherawhchu an awmna hmun tur peih fel ala nih loh avangin CISF Unit zinga 121 an lo kal phawt dawn a ni.

*Voicecast : India hmarchhaka awm Mizoram hi thenawm ram Myanmar leh Bangladesh ri-a awm anih avangin India Act East Policy tih hlawhtlin nan a pawimawh hle a, state lian nilo mahse Southeast Asia te nena sumdawanna inthlunzawmna atan pawimawh tak anih avang hian sawrkar laipui pawhin ngai pawimawhin hmasawmna hrang hrang a thlen tir tawh a, tuna Lengpui Airport CISF in an enkawl tur pawh hi hmarchhak state-a venhimna a that lehzual zawk theihna tura ruahman a ni a, Hetihlai hian Lengpui Airport venhimna CISF kuta dah tura ruahmanna hian Lengpui Airport chu Airport Authority of India kuta hlan a nihna tur atana kawng hmasa ani em tih chu Mizo mipuite hriat chak ber a ni.*

<><><>

J&K

Pahalgam-a firfiakte chetna chhanlet nan India chuan Pakistan nena Indus Water Treaty 1960 a neih mek chu a titawp. Heng bakah hian Attari Integrated Check Post chu khar nghal a ni bawk. Prime Minister Narendra Modia kaihhruaia Cabinet Committee on Security, CCS thukhawm chuan ramchhungah venhimna khauh taka kalpui nise tiin an rel a. Foreign Secretary Vikram Misri chuan CCS thutlukna zingah Pakistan mite chu SAARC Visa Exemption Scheme (SVES) visa hmanga zin veivah phalna pek thin pawh tihtawp anih thu a sawi a. Tuna SVES Visa hmanga India-a awm mek Pakistan mite chu darkar 48 chhunga India chhuahsan tura hriattir an ni a ti a. CCS thukhawm chuan firfiakte chetna hi na taka a dem thu a sawi bawk a ni.

Puan tawh angina Union Home Minister Amit Shah-a chuan nimin khan Pahalgam-a firfiakte chetna hmun Baisaran ngaw hmun tlawhin thil thelna dan a enfiah a. Anantnag Hospital-a hliam tuar enkawl mekte a tlawh bawk a ni.

Thudawn danin Jammu & Kashmir-a Pahalgam-a firfiakte chetnaah hian khualzin 26 kahhlum an ni a. Midang engemawzatin hliam an tuar. Pahalgam hi Srinagar headquarters atanga km 85 a hla, Anantnag district chhunga awm niin nimin chawhnu lam khan firfiakte hian khualzinte hi an bei a. Mitthi zingah hian rampawn mi pahnih leh Kashmiri pahnih an tel a ni.

<><><>

PARTY LEADERS CONDEMN

Ramchhunga Political party hruaituten Pahalgam-a firfiakte chetna an dem thu an sawi. Union Minister leh BJP President JP Nadda chuan civil mi pawisawi lo bituma dawihzep taka chetna chu a dem thu a sawi a. Narendra Modia sawrkar cuan

firfiakte lakah ngaihnamna engmah a nei lo tih sawiin tuna pawikhawihute pawh chhuah an ni lo ang tih a sawi.

Defence Minister Rajnath Singh, Union I&B Minister Ashwini Vaishnaw leh Union Minister leh LJP (R) Chief Chirag Paswan te pawhin an dem thu an sawi a.

Congress hruaitu Mallikarjun Kharge chuan fifiakte chetna chu a dem thu sawiin rampumin inpumkhata ramria firfiaka chetna an do a ngai tih a sawi a. Lok Sabha Opposition Leader Rahul Gandhi pawhin Pahalgam-a firfiakte chetna chu demin mi dawihzep an nih thu leh rampumin inthurualin firfiakte an beih a tul thu a sawi.

West Bengal Chief Minister Mamata Banerjee leh Samajwadi Party chief Akhilesh Yadav, Tamil Nadu CM M K Stalin te pawhin he pawikhawihna hi an dem thu an sawi bawk a ni.

<><><>